

四庫全書

集部

欽定四庫全書

集部

御定歷代賦彙卷一百

三十八至
四十

詳校官檢討臣劉 炘

主事銜臣徐以坤覆勘

總校官編修臣王燕緒

校對官中書臣潘曾起

謄錄監生臣余袁頴

欽定四庫全書

御定歷代賦彙卷一百三十八

鱗蟲

蟬賦

魏
曹植

惟夫蟬之清素兮潛厥類乎太陰在盛陽之仲夏兮始
遊豫乎芳林實澹泊而寡慾兮獨怡樂而長銓聲數數
而彌厲兮似貞士之介心內含和而弗食兮與衆物而
無求栖高枝而仰首兮漱朝露之清流隱柔桑之稠葉

兮快啁號以遁暑苦黃雀之作害兮患蟪蛄之勁斧冀
飄翔而遠託兮毒蜘蛛之網罟欲降身而卑竄兮懼草
蟲之襲予免衆難而弗獲兮遙遷集乎宮宇依名果之
茂陰兮託修幹以靜處有翩翩之狡童兮步容與於園
圃體離朱之聰視兮姿才捷於獼猴條罔葉而不挽兮
樹無幹而不緣翳輕軀而奮進兮跪側足以自閑恐余
身之驚駭兮精曾睨而目連持柔竿之冉冉兮運微黏
而我鯉欲翻飛而愈滯兮知性命之長捐委厥體於膳

夫歸炎炭而就燔秋霜紛以宵下晨風烈其過庭氣潛
怛而薄軀足攀木而失莖銍嘶啞以沮敗狀枯槁以喪
形亂曰詩歎鳴蜩聲嘒嘒兮盛陽則來太陰逝兮皎皎
貞素俟夷節兮帝臣是戴尚其潔兮

蟬賦

晉傅玄

美茲蟬之純潔兮稟陰陽之微靈含精粹之貞氣兮體
自然之妙形潛玄昭於后土兮雖在穢而愈馨經青春
而未育兮當隆夏而化生忽神蛻而靈變兮奮輕翼之

浮征翳密葉之重蔭兮噪閒樹之肅清緣長枝而仰觀
兮吸渥露之朝零洎無為而自得兮聆商風而和鳴聲
嘒嘒以清和兮遙自託乎蘭林嗟羣吟以近唱兮似簫
管之餘音清激暢於遐邇兮時感君之丹心

蟬賦

唐
馬吉甫

鶉星兮御夏鵲鳴兮登序日月驟而運長羸陰陽爭而
催小暑詢求縱賞之地枚卜追涼之處尋川徑而棲遲
頓林庭而延佇則有應律初蟬含生自然其聲嘒嘒其

翼翩翩參萬物之動植隨四序之迴旋避啼鶯於春後
伴鳴蛩於秋前廉而有德靜而無累逸豫攸安沉吟斯
慰體素質而標儉養清心而拔萃食不求粒雖黍稷而
非珍棲不擇林縱梧桐而何貴暨夫三危露結四野雲
平蒼茫日暮爽朗天明託高枝以庇影竄密葉以流聲
匝池臺之響亮洞巖壑之清泠羣吟則少懼孤引則多
驚時行時止有虧有盈疑紡絡之雙至似簫韶之九成
避雀飛急迎風翅輕飾鬢裁新樣圖冠有舊名雖屈螳

娘之斧終齊鵬鷗之情若乃平子歸田仲長就第新開
泉石之賞俯洽琴歌之契莫不應促軫而方遠赴調絃
而轉麗繁音遞進顧白雪而難酬逸韻爭馳對薰風而
莫繼足使牧子興感雍門下涕降翔鶴於雲端出潛魚
於水際復有沙塞征夫山川遊子風蕭蕭兮八九月路
悠悠兮千萬里坐聽霜鴈自無聊復對寒蟬怨何已望
鄉闕而思積撫搖落而愁起悲深嘶馬之初淚斷啼猿
之始觸類多感於何不傷伊茲蟲之菲陋識君子之行

藏其立志也不慕於鴻鵠其守分也不越於榆枋任朝
夕之棲處極天地之翱翔適其性韜其光豈比飛燕之
巢幕流螢之聚囊至如八檻愁猿觸籠窮鳥繫透木之
幽志屈凌雲之遐矯豈無故而嬰羅諒有求而自擾聊
息心於萬事放寓跡於一枝澹然兮自守千秋兮若斯

寒蟬賦

有序

晉陸雲

昔人稱雞有五德而作者賦焉至於寒蟬才齊其美獨
未之思而莫斯述夫頭上有綫則其文也含氣飲露則

其清也黍稷不食則其廉也處不巢居則其儉也應侯
守節則其信也加以冠冕則其容也君子則其操可以
事君可以立身豈非至德之蟲哉且攀木寒鳴負材所
歎余昔僑處竊有感焉興賦云爾

伊寒蟬之感運近嘉時而遊征舍二儀之和氣稟乾元
之清靈體貞精之淑質吐呼吸之哀聲希慶雲以優游
遁太陰以自寧於是靈岳幽峻長林參差有蟬集止輕
羽莎佗承南風而軒景附高松之上華黍稷惟馨而匪

享竦身晞陽乎靈和喉乎其音翩乎其翔容麗蜩蟬聲
美宮商飄如飛鴻之遭驚風眇如輕雲之麗太陽華靈
鳳之羽儀覩皇都乎上京跨天路於萬里豈蒼蠅之尋
常爾乃振修綏以表首舒輕翅而迅翰吸朝華之墜露
含烟煴以夕餐望北林以鸞飛集樛木以龍蟠彰淵信
以嚴時稟清誠於自然翮眇微妙繇蠻其形翔林附木
一枝不盈豈黃鳥之敢希惟鴻毛其猶輕憑綠葉之餘
光景秋華之方零思鳳居以翹竦仰佇立而哀鳴若夫

歲聿云暮天上其涼感運悲聲貧士含傷或歌我行永
久或詠之子無裳原思歎於蓬室孤竹吟於首陽不銜
子以穢身不勤身以營巢志高於鴈鳩節妙乎鵲鴞附
枯枝以永處倚瓊林之迴條惟雨雪之霏霏哀北風之
飄飄既乃雕以金采圖我嘉客珍景曜爛曄曄華豐奇
侔黼黻豔比袞龍清和明潔羣動希蹤綴以玄冕增成
首飾纓綈翩紛九旒容翼映華蟲於朱袞表馨香乎明
德於是公侯常伯乃紆紫黻執龍淵俯鳴玉珮仰撫貂

蟬飾黃廬之多士光帝皇之侍人騰儀像於雲闥望景
曜乎通天邁休聲之五德豈鳴雞之獨珍聊振思於翰
藻聞令聞以長存於是貧居之士喟爾相與而俱歎曰
寒蟬哀鳴其聲也悲四時云暮臨河徘徊感北門之憂
殷歎卒歲之無衣望泰清之巍莪思希光而無階簡嘉
蹤於皇心冠神景乎紫微詠清風以慷慨發哀歌以慰
懷

風裏蟬賦

陳
褚
玠

有秋風之來庭於高柳之鳴蟬或孤吟而暫斷乍亂響而還連垂玄綫而嘶定避黃雀而聲遷愁人兮易驚靜聽兮傷情聽蟬兮靡倦更拍兮風生終不校樹兮寂寞方復飲露兮光榮

鳴蜩賦

晉傅咸

有嘒嘒之鳴蜩於台府之高槐物處陰而自慘奚厥聲之可哀秋日悽悽兮感時逝之若頽曷時逝之是感兮感年歲之我催孰知命之不憂詠梁木之有摧生世忽

兮如寓求富貴於不回且明明以在公唯忠諫之是與
佚履道之坦坦登高衢以自棲

鳴蟬賦

有序

宋 歐陽修

嘉祐元年夏大雨水奉詔祈晴於醴泉宮聞鳴蟬有感
而賦云

肅祠庭以祇事兮瞻玉宇之崢嶸收視聽以清慮兮齋
予心以薦誠因以靜而觀動兮見乎萬物之情於時朝
雨驟止微風不興四無雲以青天雷聲隱其餘聲乃藉

芳葯臨華軒古木數株空庭草間爰有一物鳴於樹顛
引清風以長嘯抱纖柯而永歎嚶嚶非管泠泠若絃裂
方號而復咽淒欲斷而還連吐孤韻以難律含五音之
自然吾不知其何物其名曰蟬豈非因物造形能變化
者邪出自糞壤慕清虛者邪凌風高飛知所止者邪嘉
木茂樹喜清隱者邪呼吸風露能尸解者邪綽約雙鬢
修嬋娟者邪其為聲也不樂不哀非宮非徵胡然而鳴
亦胡然而止吾嘗悲夫萬物莫不好鳴若乃四時代謝

百鳥嚶兮一氣候至百蟲驚兮嬌兒姹女語鸝庚兮鳴
機絡緯響蟋蟀兮轉喉弄舌誠可愛兮引腹動股豈勉
彊而為之兮至於污池濁水得雨而聒兮飲泉食土長
夜而歌兮彼蝦蟇固若有欲而蚯蚓又何求兮其餘大
小萬狀不可悉名各有氣類隨其物形不知自止有若
爭能忽時變以物改咸漠然而無聲嗚呼達士所齊萬
物一類人於其間所以為貴蓋以巧其語言又能傳於
文字是以窮彼思慮耗其血氣或吟哦其窮愁或發揚

其志意雖共盡於萬物乃長鳴於百世子亦安知其然哉聊為樂以自喜方將考得失較同異俄而陰雲復興雷電俱擊大雨既作蟬聲遂息

蟬蛻賦

以一體區分雙形酷似為韻

唐

左 牢

物之化兮則多蟬之類兮惟一棄捐無用之甲振奮有聲之質彼則曲拳擎跢附麗修條此則遠害全身飛鳴永日當其閒園向久輕吹無聞衝孔之異狀初出寓物之雙形欲分暗入幽叢上纖莖而繚繞時搖殘萼散芳

氣之氤氲於以警素秋於以戒炎酷進退如懼攀援欲
速兢兢而恐墜微躬步步而竟升高木來能應候禍豈
避於剗腸去乃乘時智終期於剖腹煙月思寡懸垂勢
孤以抱膏肓之疾待成胡越之區拳跼而投足既定蹙
縮而脫身是圖漸呀然而甲拆俄豁爾而形殊前程而
遠寄園林如矜得路下視而若遺枯朽孰肯守株由是
乍舉輕躬初留具體薄翼而朝陽始照玄縷而宿露新
洗纔發響於林下已傳聲於澗底驗形有二責實無雙

啾啾而送恨蓬戶嚶嚶而添愁瑣牕吟遠樹於荒郊思
盈秋野噪寒花於別浦韻遠晴江則知造化之旨難窮
其理何末異而本同何一生而一死其死信不自以為
辱其生信不自以為美能彼我而兩忘則榮枯而相似
別有甘穴居於聖代期羽化於天庭久羨出身之術多
慙負贅之形高枝尚遠短景難停儻遭逢於此夜冀音
響之堪聽

蟬蛻賦

以變化逢時飛
鳴有日為韻

唐

李遠

勿謂乎蟬之至微能變化以知機因挺質以竦拔遂脫
身而奮飛餘殼連拳抱綠葉而猶在新聲響亮噪清風
而不歸原夫深穴初開空庭始夜步凌兢而微進形磊
砢而將化託身而去上風篁投跡而來緣月榭履險微
駐愁危却下纖枝不定懼褻褻以頻移弱蔓難窮騰搖
搖而盡亞於是輕軀暫息一足才容時驚鬬鼠乍怯鳴
蛩踟促而初安利爪逡巡而欲改前蹤想黃雀之飢腸
先憂見捕念螳螂之怒臂預恐相逢已而踧踖拳形穹

隆奮質既踳發而微斷若苞開而漸出擘肌分理有謝
於昔時露膽披肝請從於今日騰超稍異竦擢如今新
綏薄嫩舊翼羅輕觀腋分之折裂訝脈散之縱橫嗟累
卵之勢危方求上達歎含風之力寡未敢先鳴及夫據
嶮形柔拏空股戰方疑乎蠓屈終類於龍變洞胷達腋
玲瓏而素甲皆虛潔已全身輝赫而玄光已遍俄分曙
色似遇良時便有凌空之意還生去故之悲嗚嗚而頻
遷碧樹淒淒而若紡寒絲響遶晴雲傳楚岸之風遠聲

惟晚景怨陶家之柳衰至若委蛻難留冲虛已久體將
泰而是望皮不存而何有儻假一枝願飛聲而不朽

蜩甲賦

以似之而非為韻

唐魏 炤

精氣為物物必有依遊魂為變變亦有歸蜩者精氣所
聚甲者遊魂以飛功存造化理暗幽微察形如在責實
而非觀乎離隱出穴先號後喜或附枯枝或映深水揮
幽跼伏臨危聳峙致身勞苦不獨附贅懸疣動足艱難
何殊駢梅枝指上懼於雀下憂於蟻情有感於仁人事

不可乎以已效神仙尸解之術得龍蛇變化之理雖欲
全生且同半死既坼既副如動如止一體區分雙形酷
似高冠而立睥目而視莫躁其心能靜諸已飲露則躍
翻風忽起再生之命蠢焉不存之皮朽矣覩遺跡於棄
甲想能鳴之在耳空披腹心徒伏泥滓其內也既等混
沌之無竅其外也何患螭蜃之利背與繪事而均功齊
木偶之所擬昔則如羹如沸孰能聽之今則不飲不食
何憂餒而數往有分塗窮有時雖滅天理尚存幽姿已

脫輕翼猶帶懸縷有象受服者解褐衣而去又同適越者棄章甫於茲既逍遙以脫屣非蠶芥以僵尸其靈託焉遽廬可以設喻其質去矣魍魎曷足措詞文非變虎殼等枯龜莫懷爾詐仍謂我欺心通者不惑性殊者猶疑君徒見僵仆塊然而無用曾不知脫身輕舉而莫追

黏蟬賦

有序

晉傳咸

櫻桃為樹則多陰為果則先熟故種之於廳事之前時以盛暑逍遙其下有蟬鳴焉仰而見之聊命黏取以弄

小兒退惟當蟬之得意於斯樹不知黏之將至亦猶人之得意於富貴而不虞禍之將來也

有嘉果之珍樹蔚弘覆於我庭在赫赫之隆暑獨肅肅而自清遂寓目以周覽見鳴蜩於纖枝翳翠葉以長吟信厥樂之在斯苟得意於所歡曾黏住之莫知匪爾命之遵薄坐偷安而忘危嗟悠悠之耽寵請茲覽以自規

聽早蟬賦

以吸風飲露為韻

唐蕭穎士

清商兮暮急白露兮朝濕伊寒蟬之早聞知涼風之初

入散亂搖颺脩寥歛吸前聲未盡後響仍及邇層檐而
驚歸向茂樹而遙集足令志士傷惋征夫佇立動閨人
之夜悲垂塞客之秋泣况乎日晏天空晴景微風命儔
嘯侶乍西或東既更鳴而迭息亦處異而音同催渡漢
之離鴈伴橫階之思蛩空庭暖其已寂遐路杳而難窮
伊蛸蟬之至細王雎獨而猶稟體孤高而自適候時節
而斯審其處也敦兮若樸乃蝤蛸而未化其出也道之
將行必沆瀣而方飲豈徒爾雅辨其名體詩人詠夫章

句味編本草之錄聲徹上林之賦歌郢宰之化偶范綏
而見稱飾趙王之冠與貂尾而胥附莊篇載疴僂之志
孔氏感螳螂之捕苟動靜不爽飛鳴有度因依密葉蕭
散凝露韜餘陰於歲晚等羣蟄於時暮茲括囊而用吉
又曾何鳥雀之能喻

蜜蜂賦

晉 郭璞

嗟品物之蠢蠢惟貞蟲之明族有叢瑣之細蜂亦策名
於羽屬近浮遊於園薈遠翱翔乎林谷爰翔爰集蓬轉

颺迴紛紜雪亂混沌雲顏景翳耀靈響迅風雷雨乃眩
援之雀下林天井青松冠谷赤蘿繡嶺無花不纏無陳
不省吮瓊液於懸峰吸澠津乎晨景於是迴驚林篁經
營堂窟繁布金房疊構玉室咀嚼華滋釀以為蜜自然
靈化莫識其術散似甘露凝如割肪冰鮮玉潤髓滑蘭
香百藥須之以諧和扁鵲得之而術良爾乃察其所安
視其所託恒據中而虞難營翠微而結落微號明於羽
族閭衛固乎管鑰誅戮峻於鈇鉞招徵速乎羽檄集不

謀而同期動不安而齊約

蜂賦 有序

元 劉 詵

蜂有君臣之義朝參其一耳若徇忠死節繫名教尤大則不可不之錄也作蜂賦

翳顯穹之陶形兮人與物而同鈞宗一本而有支兮首萬國而為君惟偏全之異稟兮乃人物之由分起羽屬而獨出兮異哉蜂之如人或以微而不致索或以毒而不敢親孰知肖翹之蜚翼而能有尊卑之大倫若乃春

妍景輝玄鳥來歸幽巖縟繡窮林錦蜚於是晬晬窺窳
翁翁八洞斜縈偃月大取懸甕將卜食以告遷亦相時
而後動是則胥宇之水滸相宅之洛上也至若日吉辰
良晴風燠陽其聲也如鉦鼓之合節其陣也如甲兵之
成行出則漸密飛則載揚如嬰如扇衛小子王是則就
邸之支庶分藩之令主也而乃金房初建玉宇未成駢
肩構度聚首經營卷然似粟是為靈臺千門萬戶環向
四開是則經始之勿亟庶民之子來也周廬既列課法

爰作股負香兮成九翼汲水兮如杓於是凝芳敵蘭積
潤儔醑府庫充溢蠹不知其樂千萬落專一意以上供
亮竭力以誠樂命黑衣之虎賁守重門而司會惰者必
殺不以小大是則交征之庶土底慎之財賦也蕩蕩華
華一日兩衙歌聲雷震朝罷無譁方其旅進旅退如向
如對儼降升而後揖甚趨庭而列拜此常參而宴見無
更直與輪代間日移陰王乃時巡陟高丘循下壘咸戢
戢而欣欣騁非八駿扈無三軍何曾蹙頞以疾首乃能

省方而觀民而或宮車駕暮不遊不豫羣聚於穴誓無
背去別瑤林兮玉樹謝金谷兮琪圃無面目以偷生絕
紛華而不顧於是閉口却粒垂頭喪氣納一命於所天
萃百萬而同死蓋商餘孤竹之二子齊橫五百之壯士
也嗚呼辛螫之求周詩是憂有毒維蠆春秋所戒豈知
物微性至五常俱備未容僅比於螻蟻而不識其事也
可以証鬼神而質天地是故應期而朝信且禮也多思
而營巧且智也效死不二志於義也割脾而施仁之惠

也嗟一氣之忠烈亘萬古而不折事莫小於餓死尤莫大於失節胡委質而為臣兮顧背主而改轍彼瀛王事十姓兮可以人而不如物吾託蜂異以勸來世蓋不特演周公之雅而廣張華之志也

唐風賦

宋薛士隆

有唐氏之封國都蟠木之甬東馬牛遠而不及舟車絕而不通其民穴處比屋開房王宅中都深嚴九重挾甬道之交馳敵離宮之虛邃援臂接其鈎連拱周廬之環

衛舉袂歛其風生發語轟其鼓合繁邑居之浩穰紛往
來之雜運循有國之彝倫正君臣之上下有一姓之常
尊越啓邦乎遂古曾纂殺之無聞信戰爭之無取王屬
烏姓其民黃氏服色所尚烏黃而已民佩觿以為飾宗
室壯而虛居偉敦龐之厚貌極骯髒而睢盱王之儀表
特多奇異翹然出類胡然極貴望之不似人君就之而
不見可畏王好細腰邦人謹飾王好長裾邦人馮翼上
不令之攸行民戴君以為命力作而不敢告勞焉以奉

王之同姓所謂主在與在主亡與亡一國待一人而治
萬室同一家之政者也載朝載夕御於君所有覺彤庭
坎其擊鼓濟秩秩之朝儀迅踰蹏之抃舞胡風雨之蕭
騷振衣裳之楚楚寄邦刑於警吏法惟牢戶之填罰有
犯而惟行拉腰脅而捐矐上無酤權之禁民習釀以成
風醞百花而家給亶公私之大同賦稅之法以臘而征
獵取於教甘如飲錫念苦辛之卒歲嗟誰為之營營民
俗喜遊其行無迹御非煙之翕合履空虛之絡繹粲芳

非之芬馥一花樹之離披交燕賞之駢闐匪寒溫之載
罹既醉而歸式歌且舞紉香葩以為佩惹衣芳而返處
懲野宿之王誅用不闕於外戶粵有渠蒐之戎諸种之
族由慢藏之致寇以盜招於天祿將埽除之靡力創侵
陵之云殆爰弭處於新都有遷民而遠害王息生而已
長錫茅土而封諸中邦甸而分民即新封於大都送之
者至門而返制初絕於交如國之大事莫如卜宅相考
陰陽乃謀舊德審輿情之胥悅王揆日而于行瞻一人

之驚者儼千官之景從我冠裳爰進其前佩劍崢嶸踵
其後飛騎翳其如煙翊衛紛其如雨弓弩彀而空張競
周章而禦侮載行載止載回載翔王人興而樂舉鏐鑿
鼓與龍鍾警從官之行節洵輯集其雍容動不違於車
下抑何誅於亂行遠而眺之搏如鵬翼之奮長風即而
視之宛如雲蒸雷起之應翔龍達郊闕而近止居整飭
於威儀以次即於新城正班列之離離其行有序其至
如歸大一王而入邑宣新令之無譁攻王室之渠渠力

公餘而後家百堵翕其皆作更番出而樵蘇王巡守於
崇朝徇邦人而有誅凡所以維綱其國者尚同人之習
夫走聞唐人之俗有五善五殆焉以德而王一善也世
有常尊二善也上下均一三善也公而後私四善也民
勤於力五善也斯五善者所以正王居於南面者也世
嫡無統一殆也大都偶國二殆也王族侵民三殆也征
之無度或時不取四殆也諸种侵軼五殆也斯五殆者
皆人力之所不逮焉者也有茲五善屏除五殆而邦無

絕奉衰微之厄俗寡宗姓侵漁之害業無惰而無勞或
罔窺其障塞走將見夫可封之俗永無聞於淪敗者矣
慨有唐之編小可言大國之風無五善之綢繆而五殆
之云崇走知其為邦之效不難乎神禹之功也感微生
之含性稟忠諒於天然聊託賦於斯文庶夫人之勉旃
已焉哉天實為之其又何言

蒲盧賦

以教彼他蟲變
成時類為韻

唐 闕名

究政化之所歸於蒲盧而可見負么磨之異族能教誨

而知變大鈞所播各異稟而殊方二氣相生遂改形而革面初其穿土取彼桑蟲負以蛸飛之勢寘諸蝸舍之中以氣相感以類相通笑鄧攸之輩無兒絕其天性若何晏之為假子養在公宮薨薨鼓翅咽咽傳意本乃與吾同物孰云所畜非類如能肖貌便若假寐因蠕動而稍分與胎教而齊致蠶尾潛出蜂腰未備將革故而就新諒未同而本異嗟乎俱為化育別感生成已改其狀復移其情躡糞土而股戰弄清風而翅輕漸能羽化永

別跂行具體皆遷雖似通於應變無心而守曾不知其
改更連拳未已奮迅復止謂我自然莫知所以舉螳螂
之臂而動振莎雞之羽乃起化形如蝶既以忘於神遷
委蛻若蟬信難窮於天理雖離本質亦匪殊姿遇穴入
易逢花去遲見其類而却為非類遇其支而翻訝何支
衆彙皆同昔不非兮今不是含生無別彼一時兮此一
時然則聖人舉以立言指而垂教謂微蟲兮猶知適變
矧伊人兮不能胥效於戲其形稍別其類靡他煦然而

方隨氣母蠢爾而共稟天和吾徵夫螺贏之與螟蛉也
見品物而居多

螟蠕賦

有序

宋 歐陽修

詩曰螟蠕有子螺贏負之言非其類也及揚子法言又
稱焉嗟夫螟蠕一蟲耳非有心於孝義也能以非類繼
之為子羽毛形性不相異也今夫為人父母生之養育
劬勞非為異類也乃有不能繼其父之業者儒家之子
卒為商世家之子卒為卑隸嗚呼所謂螟蠕之不若也

作螟蠕賦辭曰

爰有桑蟲實曰螟蠕與夫螺贏異類殊形負以為子祝之以聲其子感之朝夕而成嗟夫人子父母所生父祝之言子莫之聽父傳之業子莫克承父歿母死身覆位傾嗚呼為人孰與蟲靈人不如蟲曷以人稱

蝶賦

明 錢文薦

梁簡文與劉孝綽庾肩吾同遊後園見從風蛺蝶雙飛花上徘徊忘憂逍遙寄沉聊輟芳醕願聞高唱誰為宋

玉作賦無讓孝綽乃避席而起受簡而對曰何朽腐之
變化乃體質之輕揚既倚風以含媚仍映日其流光每
依草而依葉時尋豔而尋香始乍遊夫樂境終漸入於
醉鄉察烏足之共類審鳳子之同翔車飄飄其訝鬼夢
栩栩以疑莊乘微煙乎遠出遇細雨矣深藏雖無補於
天地亦自適夫莽蒼亮野蛾之堪賞惟閨秀之可方衣
蹁躑而舞雪粉遺落而成霜躡遊羣其撲袂窺歌隊以
採妝已諧合於素侶況遭際乎青陽念嘉辰之駘蕩識

暄晷之舒長對流鶯而口訥逐乳燕其翅忙指柳色以
導徑認花心以為房羗雙飛乎淑景勝獨處於空牀感
蕩子之易忽知思婦之難忘則有北里朱顏東鄰皓齒
芳圃獨立雕闌斜倚莫解情性難窺嗔喜發為歌聲意
有所指歌曰蛺蝶兮春園依砌兮遶垣盼佳期兮掩長
門心惆悵兮無言歌罷日薄崦嵫月升井幹物色漸斂
花陰將散捲簾影寂挑燈光粲爰命肩吾起而為亂亂
曰南園春暖盛芳菲兮戲舞從風暮忘歸兮常與花氣

無睽違兮幸得美人繡羅衣兮

螢火賦

有序

晉
傅咸

余曾獨處夜不能寐顧見螢火遂有感於是執以自照而為之賦其辭曰

潛空館之寂寂兮意搖搖而靡寧夜耿耿而不寐兮憂悄悄而傷情哀斯火之湮滅兮近腐草而化生感詩人之悠懷兮覽熠燿於前庭不以資質之鄙薄兮欲增輝乎太清雖無補於日月兮期自照於陋形當朝陽而戢

景兮必宵昧而是征進不競於天光兮退在晦而能明
諒有似於賢臣兮於疎外而盡誠蓋物小而喻大兮固
作者之所旌假乃光而喻爾熾兮庶有表乎忠貞

螢火賦

晉 潘 岳

喜熠燿之精將與衆類乎超殊東山感而增歎行士慨
而懷憂翔太陰之玄昧抱夜光以清遊類若飛電之宵
逝嚙似移星之雲流動集揚暉灼如隨珠熠燿熒熒若
丹英之照葩飄飄颯颯若流金之在沙載飛載止光色

孔嘉無聲無臭明影暢遐歆朝霞於曠野庇一葉之垂
柯無干欲於萬物豈顧恤於網羅至夫重陰之夕風雨
晦暝萬物眩惑翩翩獨征竒姿燎朗在陰益榮猶賢哲
之處時時昏昧而道明若蘭香之在幽越羣臭而彌馨
隨陰陽以飄飄非飲食之是營問螽斯之無忌希夷惠
之清貞羨微蟲之琦璋援彩筆以為銘

螢火賦

梁
蕭和

聊披書以娛性悅草螢之夜翔乍依欄而回亮或傍牖

而舒光忽翔飛而暫隱時凌空而更颺竹依牕而度影
蘭因風而送香此時逸趣方道良夜淹留眺姮娥之澄
景觀熠耀之羣遊類乾沙之火飛若清漢之星流入玄
夜而光淨出明燈而色幽時臨池而汎影與列宿而俱
浮覺更籌之稍竭見微光之漸收爾其斜月西傾獨照
蓬楹矚曙河之低漢聞夜潮之遠聲望落星之掩色見
晨禽之曉征悲扶桑之吐曜翳微軀而不明寫余襟其
未盡聊染翰以書情

螢火賦

有序

唐駱賓王

余猥以明時久遭幽繫見一葉之已落知四運之將終
悽然客之為心乎悲哉秋之為氣也光陰無幾時事如
何大塊是勞生之機小智非周身之務嗟乎綈袍匪舊
白首如新誰明公治之非孰辨臧倉之愬是用中宵而
作達旦不瞑覩流螢之自明哀覆盆之難照夫類同而
心異者龍蹲歸而宋樹伐質殊而聲合者魚形出而吳
石鳴苟有會於精靈夫何患於異類况乘時而變含氣

而生雖造化之萬殊亦昆蟲之一物應節不愆信也與
物不競仁也逢昏不昧智也避日不明義也臨危不懼
勇也事沿情而動興理因物而多懷感而賦之聊以自
廣云爾

伊玄功之播氣有丹鳥之賦象順陰陽以亭毒資變化
而涵養每寒潛而暑出若知來而藏往既發暉而外融
亦含光而內朗若夫小暑南收大火西流林塘改夏雲
物迎秋或凌虛而赴遠乍排叢而出幽均火齊之宵映

如夜光之暗投逝將歸而未返忽欲去而中留入槐榆
而燄發若改燧而環周繞堂皇而影遍疑秉燭以嬉遊
點綴懸蛛之網隱映落星之樓乍滅乍興或聚或散居
無定所習無常翫曳影周流飄光凌亂泛灑乎池沼徘徊
乎林岸狀火井之沉熒似明珠之出漢值衝飈而不
烈逢靈雨而逾煥灼灼兮若湛盧之夜飛的皪兮象招
搖之夕爛照重陰於已昏與夜燎而相炫共燭火而齊
息避太陽於始旦爾其光不周物明以自資偶仙鼠而

伺夜謝飛蛾而赴燔類君子之有道入暗室而不欺同
至人之無迹懷明義以應時處幽不昧居照斯晦隨隱
顯而動息候昏明以進退委性命兮幽玄任物理兮推
遷化腐木而含彩集枯草而藏煙不貪熱而苟進每和
光而曲全豈知鎔金而自鑠寧學膏火而相煎陋蟬蛻
之習蛻怵螻蟻之慕羶匪傷蜉蝣之夕不羨龜鶴之年
搶榆飛而控地搏扶起而垂天雖小大之殊品豈逍遙
之異筌夫何化之斯化無使然而自然若乃有來斯通

無往不至排朱門而獨遠升青雲而自致匪偷光於鄰
壁寧假暉於陽燧終徇已以效能靡因人以成事物有
感而情動迹或均而行異響必應之於同聲道固求之
於同類始未明其趨舍終詎識其指意子尚不知魚水
之為樂吾又安知螢火之所利高明兮有融遷變兮無
窮牛哀倏而化質羽泉忽兮生熊血千年兮藏碧氣一
變兮成虹知戰場之化燐悟冤獄之為蟲彼翩翩之弱
質尚矯翼而凌空何微生之多躋獨宛頸以觸籠異壁

光之照庶同劍影之埋豐觀道迷而可復庶鑒幽而或
通鑒年華以自照顧形影而相弔感秋夕之殷憂慙宵
行之熠燿熠燿飛兮絕復連殷憂積兮明自煎見流光
之不息愴驚魂之屢遷如過隙兮已矣同奔電兮忽焉
儻餘輝之可照庶寒灰之重然

水螢賦

唐
李子卿

水螢惟蟲惟蟲能天彼何為而化草此何事而居泉腹
可自持故無取於蟹足能自運亦曷憐於蛭其形也蠢

爾其光也炯然色動波間狀珠還於合浦影懸潭下若
星聚於頴川明不可以並時故當晝而潛曜暗不可以
同德故候夜而開照近而察之若海底之陰火遠而望
也辟山邊之寒燎潛伏類於全真無欲均於觀妙質未
為用自脫豫且之網餌且不貪高視任公之釣徒觀夫
因坎而止隨萍則流任晦明而隱見與風水而沉浮自
得井蛙之樂何虞轍鮒之憂儻欲觀書固不惜於餘照
如將按劍非有意於暗投火為象兮取於時而去其熱

水為宅兮質其潤而得其潔且混迹於泥沙詎等夷於
魚鼈同至人之樂道類君子之甘節覽於心乃止水之
常淨燭於物靡傳薪之無絕由此而言覺吾道之滅裂

腐草為螢賦

以積腐有光可
名為螢為韻

唐陳章

厭浥敗草霏微夜螢若受天之明命能在地以成形始
爛然於朽壤俄蠢爾於荒庭形質甚微異囊中之點點
本根既朽想河畔之青青彼若昧而未彰此如茨而久
積始前衰而委化終後顯而可覲寂然不動應大暑於

茲時默爾而成颺溫風於永夕徒觀夫從微至著出死
入生幾變青袍之色漸加丹鳥之名匪我愆期故分形
於夜朗自他有耀因易貌而宵行故得脫陳根騰宿莽
質化幽藹氣非腥腐無聲無臭同朽葦之成蛰有顯有
微殊積穀之為蟲小明必俟其時變待闇稍觀其類聚
並桃蟲而映彼中林齊藿蠋而光於舊圃始則退藏終
能發揚詎蒙龍於階砌初炳耀於池塘豈比膏腴之地
多依糞土之牆每遲留於三時不愆於候既生成於六

月必見其光徒有異於升沉信莫分於彼我得賦象而
自出故非時而不可晶熒乍起訝林際之無煙的皦漸
生疑池中之有火隕霜殺兮自晦零雨被兮增萎考書
文之小大咸若載月令而遠近相隨始經黃落之餘三
年不化既及朱明之節一日可為農夫之務既停薤氏
之芟已久飛光兮倏爾而至向晦兮於何不有斯所以
成武子之能勤冀聚之於書牖

放螢賦

元陳樵

蕙草暮闌暑除皇歡洽清夜徂命合宮侍燕胥出紫房
背椒除金吾轂警鳳燭成行渴兔洒塵飛蓋飄揚萍駕
神移椒蘭夕香千衛百騎乘堅驅良左駿驥右步光幸
帳殿臨鞠場離宮榮觀息宴無方易牙割烹儀狄挹漿
蘭般如陵桂酒如江鵠漏向丙宸賞未央皇帝惡丹燭
之易銷惜照車之未遠顧碧珪之鮮曜恨金苔之燄短
明月罷懸夜光不展怨白鳳之不來慕燭龍之遠攬乃
有黃門持橐園吏荷囊挾丹鳥馳乘黃於是綠水罷歌

豔舞離牀循桂道出蘭堂步神皋歷重岡比竹無聲蒿
軫山陽門燎轉遙園燭收光裂囊解橐從風直上亘地
彌天光燄百丈聯輝接豔互滅齊明魏璞分華漢井疏
熒瑰玫奪燄火玉辭榮白虹貫日列火為城齊連枝之
鐙樹配照夜之金精韡韡酣酣前後千乘熏夕幽玄萬
象具彰所覲維何人間天仗華旗孔蓋金璫琳琅犀羈
龍勒繡鞅玉環璫鸞搖裔飛鳥焜煌文茵毳幙風動帷
裳立馬如龍執戟如霜女騎聯鑣金碧相望巾幘輕明

微見花房鬟列四枝釵分三子華桂瓊帶光連顰悅紺
袖分明碧唾花裙衩猶殘紫海水於是乍離乍合將留
復去繞雉扇而如縈綴流蘇而欲舞映橫帶之萬釘耀
盈腰之三組拂瓊弁而懸纓投羽衣而及屨思拔貂而
遽脫已入懷而徑度桃驂振迅皇駢驚疑金盤隨兮照
夜青驤褭兮頻嘶鵲鵲忘明雞人輟晷顧鵲鵲之失枝
誤宮鴉之亂起於是離宮傳燭乘輿言旋鵲鵲鑰夜開入
宮下輦餘歡未畢影蛾零亂戶挾綃囊人操紉扇金屋

遲明銀牀拾燄帝乃乘宮車臨昵殿工登歌御三飯傳
杯授簡以命絳仙吳姬再拜而言曰丘園弱息草萊餘
燼周流蘭掖出入椒闥待詔後車策名清禁沐浴春陽
天慈光被榮添楚豔恭逢漢侈近君王之密坐思捐褶
兮燔翳同明璫之在掌方契刀之處囊非孤遠之有曜
被天子之清光恐煙霄之失路委蔓草之荒涼顧回霜
而收露幸長近於太陽乃作歌曰赫赫皇謨赤精子瀉
汩化成光萬世銀釭未冷戒鳴鷄幾度金苔委丹地綺

錢青瑣進陳囊堯禹世人同寸晷長秋宮中涎涎尾漢
以火炎烏用水於是皇帝作歌綢繆宛轉謂侯夫人起
而為亂亂曰天威燁燿景化行英姿四照宣皇明紫脫
華秀泰階平百王仰鏡萬世榮鑒增輝若木英光啓
玉度垂休聲帝乃歌曰舞玉梢兮歌發梁歌倚瑟兮行
羽觴龍腦煙寒兮成帳玉華零落珊瑚牀愛丹鳥兮往
來照禴組兮繁緝光華夜繞瓊樹枝莫向璿宮妒銀燭
長門懸月照阿嬌共聽天子無愁曲六宮聞之皆稱萬

歲

御定歷代賦彙卷一百三十八

欽定四庫全書

御定歷代賦彙卷一百三十九

鱗蟲

蜘蛛賦

晉成公綏

獨星懸於浮處遂設網於四隅南連大廡北接華堂左
憑廣厦右依高廊吐絲屬絡布網引綱纖羅絡幕綺錯
交張於是蒼蚊夕起青蠅昏歸營營羣衆薨薨亂飛挂
翼繞足罥絲置圍衝突必獲犯者無遺

蜘蛛賦

唐 賈餗

涼風起兮秋初步。簷宇兮躊躇。有微蟲之窈窕。挂輕影於空虛。續不待筐。固無求於蟹結。而成網。若有羨於魚。觀其周旋細密。往復輕疾。縷積於纖綸。成若屈其身也。或垂之如墜其絲也。亦動而愈出。成章無札札之聲。不漏得恢恢之質。夜居於外。同熠燿之宵行。日就其功。異蟻子之時術。於是規模既辨。詭麗無儔。纖羅礙日。薄霧含秋。園影初成。有似毀方。而合輕絲。乍吐還同。不如其

柔塵飛空而胃結葉下樹而縈留可以待遊蟲於死地
為終日之養羞嗟夫積少者多因微者大始一絲而輕
絡成衆目之交會言其巧乃織婦不如語其功孰雕蟲
可配豈徒玩迴文之縹緲閱浮景之明昧風乍觸而將
紛露微霑而成類實亦愛其組織憐於琢磨將懸心而
有待信役力而無他客有志業未騁勤勞則多文章徒
緝職競不羅覩在戶之呈妍爾功既就慙閉門而守拙
吾道如何

蜘蛛賦

唐敬括

蠢爾蠅蛸樂居閒邃不資毛羽以為力不假暉光以為
媚挺自然之巧蓄多端之思託玉堂以謀生當金牕而
得地得地於中因而致功委曲面實迴環接空踈長絲
於柔指拖纖網於輕躬妙技將臨愛南軒之上月清心
欲就愁北戶之生風始裔裔而將盡幾繇繇而不窮是
經是構既勤既勗或連延於壁隅時蒙纂於楹曲雜花
幌而左右交引綠錦屏而遠近相屬爾其乾坤務生運

動多情窈窕前移有作調梭之勢逶迤下退無聞震躡
之聲遠而瞻籠絡紛披如冒罟罟愚之結出迫而察嬋
娟斐亶似綾紉綺縠之綴成至如河漢佳人濮陽美婦
蜀江新製秦樓妙手將積功之多塗固仁智而同壽且
驗以張弛效其縈紆疎而不漏細而勿逾貼飛花則亂
錦霑皓露則垂珠彼蒼蠅兮則營營而見繫此粉蝶兮
亦栩栩而就拘則知繫縲紲者信非其罪囚羑里者又
匪其辜韓非所以飲恨伍子所以捐軀痛凝脂兮若爾

祝一面而得乎雖復龍之神兮深其穴而自全隼之捷
兮高其巢而取樂龍竟入於炮醢隼終嬰於弋繳彼守
道者當然況履危而可作既而倚伏無次職此之由應
塞而止從波而流四皓可以投契五湖可以泛舟即松
石之堪保奚名利之足求子徒羈牽於弋網期遠害而
能無少憂

蟋蟀鳴西堂賦

以始入於門漸
藏牀下為韻

唐張隨

歲云秋兮秋亦暮止西堂寂聽之時蟋蟀寒吟之始紛

稍稍以驚節洞嚶嚶以橫耳若夫八月在宇三秋及門
清韻畫動哀音夜繁潘生感而增思宋玉傷而斷魂於
時招搖北馳河漢西瀉煙澄寥廓露肅原野背暑而出
爾草間驚寒而入我牀下或有聲相應氣相依雜蟪蛄
於內屏混熠燿於前除羅幌燈寂珠簾月疎掖庭聞而
夜久華省聽而秋餘若乃愁雲結陰暮雨流濕拂寒威
之密邇當暝色而逾急我堂既在我室既入亦何異羣
鳥養羞昆蟲閉蟄嬾婦也唯爾可以促女功羈人也唯

爾可以催客泣夜如何其夜未央天晴地白月如霜士
有衣絺綌坐藜牀怨空階之槁葉聆暗壁之寒螿乃言
曰何彼蛩矣與時行藏火氣鬱蒸迹邁於中野秋氣融
朗聲聞於西堂然後屏輕簾卷涼簟時歲忽以徂謝功
名曷其荏苒美幽化之有成陋晉風之太儉夫如是莫
不驚白露之蟲躍望青雲之鴻漸

聽秋蟲賦

唐
李子卿

時不與兮歲不留一葉落兮天地秋
沉白露之夜遙聽

陰蟲之啾啾且鳴因夜急思以秋苦始趑趄而緣階轉
嚶嚶而入戶輕颺颺而韻合殘溜冷而響聚隴水咽而
應然峽猿啼而何取由是知悲秋者自此生興感物者
因茲為主則有三年逐臣千里遠客鄉路何處君門且
隔吟澤畔之風秋卧江臯之煙夕逆旅愁聽鳴蛩四壁
欲解寒衣蕭然淚滴婕妤恩薄義猶辭輦永巷秋深層
城夜淺涼月斜照明河近轉塵滿瓊鉤珠簾不卷秋聲
四八曼睂雙泣長樂歌鐘悲來莫辨香櫺甲第趙李經

過霞擁繡軸風調玉珂高堂引滿醉舞婆娑永夕之樂
孰知其他清露醒後遠砌聲多瞪視凝聽傷如之何去
歲良人遠征絕域錦書欲寄翩翩鴈翼不語朝紡含顰
夜織其那空閨悲鳴亂逼欲夢翻驚方愁更憶臆絕聲
聲門前月色貧士失職寂寞下帷蘭葉風敗苔痕雨滋
覽鏡而玄髮將白拂塵而素衣已縑柴門日暝響沸茅
茨展轉孤枕偏驚故時念懸鶉之正弊恨躍馬之將遲
何必葉落自長年悲且蟲之聲也無端人之聽也多緒

亦由心羈者多感激志苦者易悽楚苟有任於行藏亦何嗟於寒暑水之積也鱗斯奮風之厚也翼斯舉彼數蟲兮何知且逍遙以容與

鳴蟲賦

宋 孔武仲

微哉鳴蟲也彼各有徒深者潛形於數仞之壁高者或託於百尺之梧嘈然四起雜爾相呼其幽陰悲愁如寡婦秋歎於幃幄其荒涼慘淡似客舟夜語於江湖其聲若曰歲既秋矣涼生暑徂霜稜稜以將結露炯炯而歸

蕪茁然豐者為白草翁然秀者為枯株彼無情而若此
況吾儔飲泉食土壽命不長者歟余聞而誚之曰是何
譏譏之多也天地至公惟有生死抱陰而隕乘陽而起
顧無物而不然尚何為乎憂喜取於爾類則有麟鳳之
與蜉蝣譬諸吾人則有彭祖之與殤子雖萬口之譁
訴高明而不已恐造物者聞之必有按劍而盼者矣不
取戮於天公將見殲於社鬼語未畢歸而自尤曰彼之
所以異於吾者躁也吾之所以賢於彼者默也奈何紛

紛與之爭言是吾惑也不若收視反聽外與之絕既而
長城鼓闌遠漢星滅日出東隅蟲聲遂歇

秋蟲賦

宋 陳造

金飈之淒清鴈空之澄凝叢悽聚悲而為萬壑之秋聲
非鐵心而木腸疇能不悼其魄而動情況夫唧唧切切
更應迭和自宇而戶彼何物邪如私語如怨慙如盆蘭
之抽緒斷而復續專中宵而悲鳴有不聞爾信能令志
士之竊歎而思婦之涕零揆生世之幾時胡歷耳而女

聽予已冥蠻觸屏螟羸捐青錢市黃糯盟新篇命白墮
究三齊之妙而供百榼之課彼夫雞臆之雕鏤螢囊之
吾伊等夜蟲之么麼

放促織賦

宋 楊萬里

楊子朝食既徹步而圃嬉遙見一二穉子集乎遠華之
堂環焉其若圍俯焉其若窺躡焉其若追也楊子趨而
往視之蓋促織之始生而尚未墜地而未能飛者也嘉
遜而不仕故高步而不卑辟穀而不飢故癯貌而不肥

既蚱蜢其修髯亦翡翠其薄衣彼其臂短而脰甚長是
故將進而趑趄翹立而孤危也楊子笑謂穉子曰汝豈
識之乎是固夫霜淒露感而恤緯征人之裳者歟身勤
心苦而提耳女功之荒者歟晝聞宵嘯自基而徂堂者
歟多言強聒身隱而聲彰者歟若悲若怨若憤若歎而
吟嘯秋夕之清長者歟奚失據於幽茂而貼身於澗藉
若是其幼且孱也迺命穉子藉以羽扇遷之叢間見密
葉其躍如曝冬日其欣然穉子反命曰是蟲也若子產

之魚圉圉然洋洋焉矣楊子使穉子反視之至則行矣

聞早蛩賦

有序

明高啓

至正丙午五月十三日夜坐中庭聞蟋蟀之聲感而有賦

龍集丙午仲月維夏祝融當衡蓐收伏駕悵炎氣之興
晝欣湛露之流夜於是蓮塘涵清梧館閔靜纖絺方御
輕箴未屏息號蟬之繁喧罷棲鵲之暗警何陰蛩之忽
鳴寤余寐而獨省稍入戶而侵幃纔緣階而傍井若暑

徂而律變簾色淒兮欲冷迅飈發兮騷騷斜漢迴兮耿
耿方其或咽如啼或激如嘯嚶嚶孤吟唧唧相弔蔭淺
莎之蒙龍翳深叢之窈窕已厭聞而愈逼乍欲尋而莫
照含清商之至音非假器而為妙促素機之情工亂朱
瑟之哀調未連響於絡緯暫依明於熠燿若乃靜院閒
宮荒園廢驛草長幽扉苔滋壞壁候月光而未旦聽雨
聲而乍夕久棄長蔭之婦遠寓窮居之客莫不對景興
愁攬衣動戚謬感年之將逝誤驚寒之已積影就燭而

誰依泪橫襟而自滴不待風凋漢苑之柳霜隕湘皋之
蘭荀斯聲之接耳即掩抑而摧殘余何為而亦起蒼悲
韻而長歎聞七月而在野實詩人之所志今胡早而不
然豈天時之或異乘火令之中衰應金氣而先至推象
類而占之若有兆夫人人事然物生兮何常庸詎測夫玄
意抱微憂而何言乃拂枕而復睡

蟋蟀賦

有序

明
陸可教

陸子夜讀書聞蟋蟀吟砌間甚悲感微物之無情驚四

序之如逝援筆成賦以寄厥懷其辭曰

良夜既半寂居鮮歡鑪煙未盡華燭將殘忽有哀聲來
自砌間顧而喟曰此蟋蟀也胡為而止胡為而鳴伊孰
使之有情無情惟熙春與茂夏兮百鳥噦噦其嚶嚶競
柔條而戀芳蕊兮矜紅衣與翠衿胡是物之瑣細兮獨
含感於秋辰爾其為聲也淒清激冽啁啾騷屑如怨如
慕如慘如悅如歎如訴如哽如咽如諧如詛如誓如訣
近者如昵遠者如別驟者如唱徐者如曳低者如斷止

者如絕靜者如思繁者如聒乍聞乍息乍流乍澀四無
人聲載啾載唧宛如驪姬中夜而泣餘韻悠揚附枕侵
牀匪伊絲竹自然宮商又如韓娥哀聲繞梁銀缸燄息
玉壺漏寂四壁寒聲曼引如一又如褒姒嘻而裂帛薄
帳寒透繁音半逗殞葉墜階迴風撲牖又如王嬙琵琶
夜奏寒堂草濕墜露初滴乍疑初雨隨風浙瀝又如英
皇瀟湘鼓瑟曲檻疎櫺孤燈夜清泠泠入耳淒淒刺心
又如文君白頭哀吟綠牕如霧流螢暗度聲聲相續如

出機杼又如木蘭當閨織素吁何其悲也故知無情者
物迺遇秋而必傷有情者人詎感物而無愴豈直月令
紀時於居壁詩人發歎於在堂王褒有侯時之頌宋玉
有悲秋之章哉爾迺瓊樓豔妾金屋麗人朱顏曄其不
再君恩極而易傾思琴瑟兮惜遙夜拂羅綺兮愁暮齡
怨瑤草之將歇悵團扇於秋深况復昭陽夢斷長信苔
生玉階露滿兮歎復歎翠被涼生兮吟重吟莫不聞聲
太息掩涕霑襟亦有關右羈妻遼陽戍婦盼交河兮無

書指邯鄲兮有路身欲化兮江上石目已斷兮河橋樹
時倦織以停機聽蟪蛄之在戶憶蘭蕙兮春初怨芙蓉
於秋暮又若驅車出塞負羽從軍離離百草莽莽黃雲
念滅虜兮何期思麟閣兮樹勲况佳人兮渭曲復愛子
兮江濱撫戈劒以色變悵離別而思惝忽悲音之互動
壯心激以如焚復有負屈才人抱奇志士書十上而無
成策屢干而未遂蒯緱劒兮誰憐黑貂裘兮已敝歎章
編之三絕兮陰符於五夜心耿耿兮日邊氣炎炎兮斗

際感是物之得時擊玉壺兮屢碎又如遷客投荒孤臣
去國屈原動湘浦之悲吳起灑西河之泣安國罷兮心
未灰蘇武歸兮頭已白此時迺見物候淒涼西風蕭瑟
耿四野之寒吟倏驚魂以蕩魄乃若析圭紫極紆組彤
庭賦秋蓮於北夜對紫微於西清唐風吟兮主德勸幽
詩誦兮民事勤猶且顧時視晷觸物驚心異潘生之感
遇同陶侃之惜陰矧懷恩而未報恐歲暮之予侵驥伏
櫪兮思騁鷹在韝兮欲騰懼心長而鬢短能無慨於茲

聲於時歎息未終庭葉驟墮呼酒獨酌廢書就枕倏起
舞於聞鷄竟達曙而忘寢

蟋蟀賦

有序

明
俞允文

蟋蟀秋蟲也猛性嗜鬪志在必勝其鳴聲又特悲壯庶
幾感靈激神固蟲勇之可畏然余覽國風月令及歷世
才士所為詩歌咸非專賦郭賈之博物多識又絕無定
名率皆相襲而未盡其理因綴叙其所產化聊以備數
焉其辭曰

伊蟋蟀之微渺兮惟秋蟲之獨靈含春華之昭質兮吸
玉液之清冷性耿介以毅武兮才盡節以傑輕挺天姿
而無因兮相歷覽其修能不程才以知類兮豈瓌異而
見珍爾其為類也則有噓吸洿淖呌嘯魁圻崩榛灌莽
之原渟渟淺草之區綠房紫莖之園黃苔白蘋之陂堀
堦瀾渙滲瀦沮洳埃藹菸菑夕勁朝稀濇濇濕濕底壅
腐餘忽焉是產為蠅為蛆別有複閣成臺離榭幽堂玄
疏黑礪之室曲瓊椒塗之房蘭金藻玉之宮璇題縹壁

之廬清馨轉蕙之館晏溫流香之渠爰有麗人妙妓姣
女妖姬姍態柔情妖蠱媚窳盤衍其中者忘日夜而冥
迷嬉綠煙燉朱液或乃淪精降魄含形儲軀詭色非純
正氣戾違繇斯言之未足稱奇余固可得而略也至若
月竈風丘蒸巒霧谷炎厓錡甌以岢嶇露壑崔嵬以
峴嶺崦嵫卷路峿巘隈隩蹊絕往蹤藪斷來牧若乃眇豹
孽狐魑獍狙狎牟格磔乎其側王虺巴蛇毒螭巨蝮
歇尼陵卯乎其傍雄鷗猛鷲鵬鷹俊鶻咆哮亶翔乎其

巔赤螭玄蜂射蠅蠹喝噬啗剖殛乎其陽山魃木魅陰
鬼厲神熊熊焉魂魂焉錚窟宅而跳陸梁復有千年積
死之樹孤軍隕馘之阮蕭蕭古尪簌簌蕪城仆雷之幹
屹雲之植櫛兮櫛兮若阨若崩疊衆怪攢百靈壯瑰偉
之所積卒成氣乎竒生其為狀也則有敦肱紫茵平膚
銀液斷斷霜葩股弩狙戟翅鏢流金翼凝點漆頂渥丹
砂項堅青馥鋸牙辟灌以齧齧巨顙硯礪而簡積馮馮
兮駸駸駘駘兮齖齖何竒形而異模差可仿像而變醜

亦將有公子王孫倖豎權威驃將豪商遊俠燕飾三川
五都之雄六郡三輔之客厭百戲之已疲歎黃金之無
益聆烈音之礚礚羨節鄂之峩額命林穴以獮秋兮彈
曜靈使西沉揮赫燂以列炬兮戒富媪以見琛爾乃賴
玄顏圻浮林鬪獬猢躑獐獐跼嶄巖剜岑峯飛聰磴濛
沉明突冥巧網四匝狡穴三門雲布星羅下無軼奔闌
茸殪魁梧臻畢獻所獲獮其最勤納以琦璜之富飴以
珠璣之榮沐以華清之潔晞以赫戲之晶攬翠葭之纓

繼擦青蠅之臊腥信襲養之既和率應機而莫櫻於是
命儔集好駢駕連纓相與很觀夫戰鬪之變態廉度其
勝負之殊形各施綵以代幟均約結以定盟設誘詭聒
用壯敵情其始也則唆唆躍躍躑躑躊躇或峙或植鐵
或蹶如陷石或瀾唵而彪咻或趨捷以狼戾或深沉以
保介或狂攘以赴勢或怦怦伺抽憑或桓桓包慷慨乍
渾奔以相囓僚急對而分躋擇肉而唰喇拉折扼吭而
攀翻秘批聲砰磕以先鳴騁後凱而彌厲或逐北而隨

旋或受詘以凌遽固三捷而三捷亦再角而再殲循性
情之自然陋孫吳之韜秘然後衆變殫單伎矧怯負者
愁賄助勝者榮立價傾兩都射溢千鎰功以虓武見貴
名以將軍是策豈獨衛鶴乘軒秦松授職此固媮樂之
方信足以極一時之偉特也若乃燕地飛霜楚水增瀾
天峭嶒而短景風颭颭而薄寒才已盡而見放形枯槁
而摧殘聲酷醜而不舒夜漫漫其未闌感唐風之覽化
興楚客之永歎亦有貧士失職獨婦棲山久客登樓愛

子氏關畸人鞠而無偶壯士去而不還臨年被戮之孤
垂老欲別之鰥忽傾耳以頽思何愁戚之多顏心有懲
而靡亂涕無從而獨消奚哀音之中人兮誰能破涕而
為歡蓋亦聲音之至妙也豈若簫琴之比律於夔襄昆
蚊之呶凝於蛇涎云爾哉亂曰素節玉貞類介士兮雲
翼振振發皓商兮馮化撰體靡有方兮窮陰彌割陽精
降兮雖有奇心怡替爽兮俾協詩歌闡靈藏兮

蟋蟀賦

明 高承埏

夜正清兮蟋蟀鳴蟋蟀鳴兮無斷聲汝助余之愁歎余
為汝而傷情匪相期而識起實因感而言生彼夫大化
匠形玄工鼓氣靈蠢同符洪纖一類咸莫為而自然各
含生而具智是故因時而動應候而鳴其為物也蒼黃
其色跼蹐其形鬚尾兼具足翼俱成貌同跳蟬狀類飛
蟬蛄蟻是伍蛩螢為朋穿庭階之曲居廡砌之橫構隙
土以為窟縈落葉以為城飲草頭之墜露照壁孔之餘
明可謂於世無求於物無爭者矣然而乘風度吟待月

送響雄聲據張清音嘹唳若絕若續如歡如愴伴夜讀
於牕前亂宵杼於機上入離人之愁耳侵幽客之夢況
緣有王孫公子嬉兒狡童綠聲訪跡卜響尋蹤周遊不
已秉燭以從截筒以為物色折箸以為先容張輿以為
羅網結草以為環攻投閒抵竇發幽搜空類晉人之覓
介子似漢使之求嚴公拔乎其尤簡乎其異鐵首蜂形
金腰虎背品質既殊聲價遂倍居之瑤盆登之瓊宇飼
之豐粒飲之潔水凡切所需莫不精備朝伺夕窺一日

數啓然猶未也招朋偕侶消暇乘閒依稀乎命帥出境
髣髴乎拜將登壇賭以玉麈注以金錢東西對列左右
旁觀策之以草幹鼓之以笑喧其形昂若其聲喑然見
形而鬪志遂起聞聲而雄心各前張牙耀刃豎鬚矗竿
挺翼直接跋足爭先一進一退載合載旋形勢既陳步
伐不愆或佯輸而乍走或凝立而持堅頡頏已久雌雄
迺殊負者斂形却竄捷者凌勢長驅餘聲不絕膽氣猶
粗逞雄僑於頃刻變勝敗於須臾蓋不離方寸之餘地

而若開八陣之壯圖莫不揚聲贊采抵掌諧呼又或寄
生水濱之遐託響深山之杳足音無聞履綦不到抱異
質而莫顯發間吟以自弔與霜草而同枯等荒壤而並
槁若是者又不知其多少然則其生也將何所為其鳴
也抑何所思其隱而藏也何所託而逃其出而顯也何
所求而期其具鬪之性也果有何不平而含忿其見鬪
之形也果為誰効力而揚威其鬪而勇也果何慕於受
賞其鬪而怯也果何乞於垂悲嗚呼噫嘻萬物一府古

來共盡動息由時行藏皆運雖遭際之或異實化歸之
俱順彼寓形宇內固已渺乎爾託鳴長夜復能幾何慨
寒風兮將至傷留連兮無多喁吁歎唧悽清宛轉一唱
三歎重於是乎有感

鬪蟋蟀賦

明 吳 綺

露老楓梧之月雲深卯色之天五雉翻盆盧看擲帽雙
犀出塹馬笑投錢劉寄奴之豪情未已賈秋壑之逸興
重騫爰徵威於羽國遂選勇於蟲兵黃金鑄稱紫玉雕

嬰既曹分其種色次部伍其重輕弱足之與強頭譜前
論系一青之及五白刪外存經於是此詡蜘蛛彼誇蜩
蝶翅翅梅花腰腰薤葉氣一鼓而不衰勇三登而未竭
其未合也如木鷄之不見其既鬪也儼鐵騎之相持爾
乃金號琵琶香稱獅子戴我頭來飽卿拳矣或始伏而
終搏或初生而後死淮陰之渡齊水輕騎潛行鉅鹿之
鬪秦軍呼聲亂起義戟銀鬚怒鉈鐵齒必甘心於亂人
將報聲於知己若夫巧在伐謀鬪非專力見壘滿而氣

生聽穀鳴而義激笑薄枝於螳川蓋覆師於蟻國宜乎
博縱千金采陳雙壁出壘升塲寒敵軍之心膽收缶論
功饗主人之梨栗也

螳螂賦

晉成公綏

仰及茂陰俯緣條枝冠角峩峩足翅岐岐尋喬木而上
綴從蔓草而下垂戢翼鷹峙延頸鵠望推翳徐翹舉斧
高抗鳥伏蛇騰鶴擊隼放俯飛蟬而奮猛臨螭蛄而逞
壯距車輪而軒翥固齊侯之所尚乃有翩翩黃雀舉翮

高揮連翔枝幹或鳴或飛覩茲螳螂將以療飢厲嘴脅
翼其往如歸

尺蠖賦

宋 鮑 昭

智哉尺蠖觀機而作伸非向厚屈非向薄當靜泉潄遇
躁風驚起軒軀以曠跨伏累氣而併形冰炭弗觸鋒刃
靡迕逢險蹙脊值夷舒步忌好退之見猜哀必進而為
蠹每驤首以瞰塗常佇景而翻路故身不豫託地無前
期動靜必觀於物消息各隨乎時從方而應何慮何思

是以軍算慕其權國容擬其變高賢圖之以隱淪智士以之而藏見笑靈蛇之久螫羞龍德之方戰理害道而為尤事傷生而感賤苟見義而守勇豈專取於弦箭

尺蠖賦

唐東方虬

六氣氤氲四時平分天道怳忽是生萬物化而為鳥兮有鳴鳳之來儀化而為蟲兮有尺蠖之能屈原夫蠖之為生也不飲不食非榮非利無欲近道處身似智幸稟天地之生亦承雲雨之施哂搏擊而爭疾輕爪牙而自

致其勇也不怯雷霆之聲其慎也寧勞鷹隼之驚浩然
無悶之境獨處不爭之地多其順時而出就暖而長吐
微絲以逍遙蹙緩步而來往當靜泉澄遇躁風興屈伸
進退翼翼繩繩同吹萬而生養體抱一以含弘聖人書
之以作誠君子行之而足徵況不才之下士敢求伸以
自矜

尺蠖賦

宋 王禹偁

蠢爾微蟲有茲尺蠖每循塗而不殆靡由徑以或躍懼

速登之易顯固將前而復却所以仲尼贊易取譬乎屈
伸老氏立言用嘉乎柔弱吾嘗考畫卦之深旨見觀象
之有以蓋美其時行則行時止則止寧鳬趨以鴻漸不
磨驚而鵲起知進知退造幾微於聖人一往一來達消
長於君子物有以小而喻大事可去彼而取此至若春
日遲遲品彙熙熙知時應候附葉尋枝每委順而守道
不躁進於多歧自中規而中矩非載驅而載馳其行也
健而不息其氣也作而不衰曲乎形類彤弓之彎矣隆

乎眷狀祝啟以陳之豈比乎蟲張網而役役蟻循磨而
孜孜者哉懿夫微物尚有伸兮有屈胡彼常流但好剛
而惡柔苟克已以為用奚反身而自求得不觀所以察
所由驗人事之倚伏考星躔之退留自然寒暑相推而
歲功及物日月相推而大明燭幽者也其或昧其機循
其迹不知我者謂我進寸而退尺探諸妙蹟諸神知我
者謂我在屈而求伸異蜂蠆之毒唯思螫人等龍蛇之
螫實可存身夫如是則蛙黽怒而受式非度德者螳螂

奮而拒轍豈量力也未若尺蠖兮慎行止明用舍予將
帥之庶悔吝而蓋寡

蚯蚓賦

唐東方虬

惟陰陽之播氣實萬類以呈形有微蟲之稟質應甲子
而濕生雨欲垂而乃見暑既至而先鳴乍逶迤而鱗屈
或宛轉而蛇行內乏筋骨外無手足任性行止物擊便
曲徒進退而皓首竟不知其所欲東西詰屈南北黃緣
上食塵塊下飲淵泉應軒轅土德之王入蔡邕勸學之

篇其體甚微其用至專瑾泥塗以自保觸鹽滋而罔全
豈造化之賦命信歸之於自然

蚯蚓賦

元任士林

大塊噫氣人籟比竹而善鳴者則有羣物以旁以注以
胃以臆以脰以翼類不足而足也彼却行之微息示土
德於帝初進不吸風露之枝退不登鼓吹之車誤中斷
於斤剗而蠕動之自如何壯聲之激發而止作之誰歟
時則綠雨圍陰碧雲漏晴江月流清得意自鳴人闕之

而復寂夜中分而既停何其異也予不聽之以耳而聽之以心而聽之以氣也嗟夫夫人之聲生於所感感生所遇耳目心志其具也喜怒哀樂其樞也故發若機括振若金石感之者形開入之者心趨是以飯牛處庖九歌五噫安知非溺喪而不知歸者邪彼且委形於天委和於壤聊以呻吟其天倪不足係人間之俯仰童子曰吁含化以濡不如抱枯含聲以呌不如冬結彼固妄鳴之子亦妄聽之矣

蝸牛賦

有序

唐馬吉甫

甲辰歲夏五月余寓居官舍時雨初止有蝸牛蠢蠢緣
堂砌而上恐致踐履之禍因命稚子移於牆陰乃潛角
縮殼而有自衛之意退為賦云

蕤賓仲月逆旅孤亭薄宦春罷門閒晝局雲漫漫兮雨
冥冥荷蕖紅兮苔蘚青卷陰風於北幌閒皓月於南櫺
觀蝸牛之蕃育何詭錯之殊形若乃順陰而起背陽而
化黃緣於草木紫委於臺榭傍庭廡以徐迴循牆隅而

亂下纖角內奮寧交觸氏之兵堅殼外圍終結野人之
舍闕爪牙兮自達無羽翼兮相借本忘情於蚌守亦何
憚於鵲嚇故其投迹多間冥心寡欲進不奔競退非飲
啄吸大道之淳精體中庸之止足匪徇物而元悔恒居
沖而守樸升清流兮不為寵頓黃汙兮不為辱豈螺識
之可量何蛻智之能較借如海蛤無脰江龜有靈懷珠
胎以自伐韜玉兆以先形螭之捕也後黃雀而寧懼魚
之貪也前翠竿而不驚觀萬夫而恕已會千載而作程

乃知無用之為用求生而喪生

蜉蝣賦

有序

晉 傅咸

讀詩至蜉蝣感其雖朝生暮死而能修其翼可以有興
遂賦之

有生之薄是曰蜉蝣育微微之陋質羗采采而自修不
識晦朔無意春秋取足一日尚又何求戲停淹而委餘
何必江湖而是遊

蜉蝣賦

晉 郭璞

惟洪陶之萬殊賦羣形而遍麗物生微於昆蟲屬莫賤
乎螻蟻淫淫奕奕交錯往來行無遺跡驚不動埃迅雷
震而不駭激風發而不動虎賁比而不懾龍劍揮而不
恐乃吞舟而是制無小大與輕重因無心以致力果有
象乎大勇出奇膠於九真流潏液其如血飾人士之喪
具在四野而交結濟齊國之窮師由東山之高垓感萌
陽以潛出將知水而封穴伊斯蟲之愚昧乃先識而似哲

蚍蜉賦

有序

唐
李德裕

此郡多蚍蜉余所居臨流寔蕃其類或聚於衽席或入於盤盂終日厭苦而不知可禦之術因戲為此賦令稚子和之

惟江潭之下國沉幽居於澤畔何螻蟻之微物亦有徒而凌亂或泮散於經笥或黃緣於食案余乃戲而問之曰爾能居厚地而漏山阿無乃處吾身而為大患蟻不能言詞以臆宣其旨曰我稟形於造化亦一氣之所甄嘗濟齊師之乏曾聞媯德之羶覩封穴而知雨驗寸壤

而得泉以時術而不怠故學者得而稱焉戴粒而遊若
巨鼇之冠神嶽繞磨而行如日月之麗青天若乃依埵
緣壁淫淫奕奕其聚無聲其行無跡值晏溫而出遊當
祁寒而入隙迅雷作而靡駭微雨灑而自適生雖瑣細
亦有行藏止若羣羊之聚進如旅鴈之翔乘其便也雖
鱣鯨而可制無其勢也雖蛭螾而不傷今願悔過戢於
垣牆豈敢同青蠅之點白汙君子之衣裳

御定歷代賦彙卷一百三十九

欽定四庫全書

御定歷代賦彙卷一百四十

鱗蟲

蓼蟲賦

漢孔臧

季夏既望暑往涼還逍遙諷誦遂居東園周旋覽觀憩
乎南蕃觀茲茂蓼紛葩吐榮猗那隨風綠葉厲莖爰有
蠕蟲厥狀似螟羣聚其間食之以生於是寤物託事推
況乎人幼長斯蓼莫或知辛膏粱之子豈曰不云苟非

德義不以為家安逸無心如禽獸何逸必致驕驕必致
亡匪唯辛苦乃丁大殃

青蠅賦

晉 傅咸

幸從容以閒居且遊心於典經覽詩人之有造刺青蠅
之營營無纖芥之微用信作害之不輕既反白而為黑
恒懷蛆以自盈穢美玉之鮮潔蠹嘉肴之芳馨滿堂室
之薨薨孰閨宇之得情

憎蒼蠅賦

宋 歐陽修

蒼蠅蒼蠅吾嗟爾之為生既無蜂蠆之毒尾又無螫蟲
之利嘴幸不為人之畏胡不為人之喜爾形至眇爾欲
易盈杯盂殘瀝砧几餘腥所希秋忽過則難勝苦何求
而不足乃終日而營營逐氣尋香無處不到頃刻而集
誰相告報其在物也雖微其為害也至要若乃華棖廣
厦珍簾方牀炎風之燠夏日之長神昏氣蹙流汗成漿
委四支而莫舉眊兩目其茫洋惟高枕之一覺冀煩歆
之暫忘念於爾而何負乃於吾而見殃尋頭撲面入袖

穿裳或集眉端或沿眼眶目欲瞑而復警臂已痺而猶
攘於此之時孔子何由見周公於髣髴莊生安得與胡
蝶而飛揚徒使蒼頭丫髻巨扇揮颺咸頭垂而腕脫每
立寐而顛僵此其為害者一也又如峻宇高堂嘉賓上
客沽酒市脯鋪筵設席聊娛一日之餘閒乃爾衆多之
莫敵或集器皿或屯几格或醉醇酎因之沒溺或投熱
羹遂喪其魄諒雖死而不悔亦可戒夫貪得尤忌赤頭
號為景迹一有沾汙人皆不食奈何引類呼朋搖頭鼓

翼聚散倏忽往來絡繹方其賓主獻酬衣冠儼飾使吾
揮手頓足改容失色於此之時王衍何暇於清談賈誼
堪為之太息此其為害者二也又如醯醢之品醬醢之
制及時月而收藏謹餅罌之固濟乃衆力以攻鑽極百
端而窺覲至於大哉肥牲嘉肴美味蓋藏稍露於罅隙
守者或時而假寐纔稍怠於防嚴已輒遺其種類莫不
養息蕃滋淋漓敗壞使親朋卒至索爾以無歡戚獲懷
憂因之而得罪此其為害者三也是皆大者餘悉難名

嗚呼止棘之詩垂之六經於此見詩人之博物比興之為精宜乎以爾刺讒人之亂國誠可嫉而可憎

憎蠅賦

宋 孔武仲

方盛夏之惱惱兮氣蘊蘊以熏心
斥纖締而不御兮將釋履而投簪
切於身而猶若此兮又况乎外物之相侵
而是時也有曰蠅者或形小於烏豆
或衣藍而冠赭其來無端其聚而積
汝腹何貯汝足何歷緣眉目與口吻
又自恃其羽翼吐舌捋髭並肱交蹠
暫却復還以千為

百是可憎矣吾將數之若夫親朋之會處景物之佳時
儷芳樽以晤語援柔毫以賦詩酒未行而已醉膳甫至
而先知浮瓜於泉沉李於水清塵埃以洒埽潔槃箸以
湔洗而乃會面北牡公遺洩矢宵漏初息晨光白微皓
露凝草清風滌衣幸視聽之蕭散已薨薨而四飛飽食
方休炎暉正午偃匡牀以假寐蔭華棖而逃暑忽伺便
而投隙集體同於飛蠱我坐爾至我行爾隨扇不暇執
拂不暇施雖有軀之七尺曾衆寡之莫知四序之間可

畏者夏汝司其晝螽司其夜嗟方寸之甚小為百煩之所舍乃曰人於萬物是亦一蟲紛然雜處大小相攻今則暫存之氣息至穢之形骸外有蚤蝨內有蟻蛔蓋與生以終始非有時而去來舍此不思而惟蠅是責則我亦褊矣何異拔劍而逐之哉

憐寒蠅賦

明駱文盛

吁嗟乎寒蠅爾胡為乎有生繫氣序之流易歛涼飈之襲楹念爾類之尚繁顧非時而營營豈弱質之能久諒

寒威之莫勝爾乃僵矣其形悽矣其聲既墜于飛復蹶
于行方縮縮以憔悴遂奄奄而伶俜黜汚莫施其枝攻
鑽曷見其能或沿几而莫起或觸櫬而輒仆障不施以
曷入塵未揮而先墮進退踉蹌將焉攸措吁嗟乎寒蠅
睠言爾寒能無爾憐感念疇昔忽復長歎方夫太昊司
辰祝融揮鞭赤日在地炎威赫然爾於斯時氣適志便
蹶足洋洋鼓翼翩翩翕兮類征虺矣羣喧逐汚湛穢醉
醲飽羶弗召以合法之莫殫恣意一時貽患百端吁嗟

乎寒蠅詎知物從化遷時不可常惟暑爾乘寒宜爾藏
庶知止而不殆或自逭於喪亡爾乃淹留濡滯自掇其
殃獨不見夫蝠游以夜梟鳴於晦妖狐乘昏尸蟲伺寐
蓋有所肆尚有所避也豈趨就之惛惛能自逃於顛躓
哉吁嗟乎寒蠅始予爾憐亦終爾患念死灰之復然將
殞枝之再蔓矧羸豕之蹢躅惟易繇之明鑒爰命童子
攘臂執紼爾撲爾摧用殄厥類靡令了遺羌除惡之務
盡弗自嫌於乘危庶幾乎庭宇虛靜幃幄褰開俟南風

之景延當時物之歲難絕擾攘於爾輩欣四體之悠哉

蝨賦

晉傅選

水與草其漸茹育茲孽而為蝨嚙味銳於秋毫刺鋸利
於芒錐無胎卵而化生搏兩翼而能飛肇孟夏以朋起
迄季秋而不衰衆繁熾而無數動羣聲而成雷肆慘毒
於有生迺餐膚以療飢妨農功於南畝廢女工於杼機

蝨賦

明楊慎

有物於此孕於丹鷄氏於白鳥育於朱陵殷於豐草翺

翻以作狀薨薨以成象昭昭以相避冥冥以相向閣閣
祿祿據以為營郁郁彬彬竊以為名震霖霖雨豐隆混
聲貞女棄骸壯士挫精公子不知筮諸靈著靈著曰計
之喙啗膚之利利在三宵羣嬉羣囂醉血不醅疾斃於
掌戟著頌喻寡徵諸玉瓦玉瓦曰仙鼠聚糧萑葦之鄉
伏斃攸戕利距森張何彼皇皇不見肅霜瓦辭難讀訊
諸射覆射覆大夫曰煙火其屯鐙燭其喜焦螟以為巢
蟻蠓以為使芸瓜而來零粟而逝秋風夕起斯害也已

公子喻矣是曰螽理

後螽賦

明楊慎

邃古史皇創奎畫兮曲脚旁低垂物則兮謚曰螽民昭
凶德兮炎后品物世匱資兮蠆尾虺首罔攸遺兮喈爾
蛸化百靡宜兮擾龍儀鳳於帝庭兮嗟爾有生胡營營
兮禁鼃去帛著周經兮胡爾利策獨無懲兮玄圭紀正
炯弗昧兮丹良為羞欣絕彙兮鼇戴山抃聖播跡兮使
爾負山諒何力兮謂爾有睫奚誰攘兮竚窳琅疏競來

往兮謂爾有臂奚誰況兮明潛宵征侶罔兩兮旅蜚成
市仙孺惕兮聚響成雷藩侯慄兮障爾燂爾徒宜疾兮
蠹不能辯對以臆兮肖翹蠕動生以息兮倣詭妍媸寧
有極兮血國三千彼貨殖兮曷云不慘喑有國兮赤口
燒城煩言嘖兮積毀銷骨瘡痂結兮楚組齊帷疇其隔
兮赤燧頽燂罔有懾兮命曰人蠹理可說兮惟蟲能蟲
各以類兮厥以恒性賤剖貴兮人蠹不懲蟲何罪兮百
爾君子無庸喙兮

蝥賊

明 傅占衡

秋風清秋蝥競南郭先生枕書不瞑頭足相救勞於奔
命於是援羽扇而揮之且揮且罵曰叱毒哉蜉蝣春鳴
而秋止渠略朝生而暮死天胡為而滋此自夏徂秋為
民生憂使我夜不難燭耿耿於幽室之中者非而儔也
邪吾聞自淮以南謂之蝥踰河以北謂之蝥然則蝥蝥
類也如蝥而翼如虎而翰蝥猶可禦汝莫能搏虎有弗
入蝥無不鑽利嘴刺骨目察毫端負山匪力合黨亡難

乍鳴則耳為之聒忽瘡則肌為之酸舉妍媸而畢害究
賢愚而靡歡且汝得氣於水草之交連類於蟻蠓之小
肝腸樂何啼飢不了多於趁人之山蠹噪於惡聲之梟
鳥露下氣清天高月明原田未燒溪上草青盡命儔而
嘯侶皆飲莖而漱英何故擾我懈倦散吾精精特矜憐
其靡靡姑右拂而左縈試佯寐而掩捕汝則無有餘刑
先生罵未卒而疲似夢而浮似覺而沉恍惚聚言有若
雷音曰有是哉先生之不廣也予有籍於帝輕舉若仙

宗黨蕃庶宮室羊眠藏光用晦唯蟲能天夫人合四大
以成形伺陰陽而偶竊氣霧騰而充膚汗雨流而凝血
何異草木之膏獨拒么麼之嚙若乃蚤輕而儼蟲淫而
貪皆君身之食客嘗自處於東南徙此留而彼逐詎寢
夢之能甘且物受性曰命交相養曰德惟其飛而食肉
斯蠹氏之稼穡譬之士以攻閱穿鑿為雄商以牟利欺
紿為職銓衡則豐屋於遷除臺省則穴金於恐嚇主計
者乾沒縣官之錢典廩者卮漏太倉之積行伍乎牙蠹

之公田郡邑乎監司之奉戶其餘更吞迭哺相為患苦
文武之吏實為赤黑之蟲功曹之官即是都城之虎獨
賊欺人為糧悍兵貫人而舞所謂人與人相食者也如
蝨者又焉足數乎先生必欲密其情帷濃其薰灼絕千
年之種屬安四海之夢覺曾不見乎露筋之祠飼蝨之
佛有殺身以成仁無便已而窮物故且吸風飲露晝伏
宵飛雜螢火之隊餉蝙蝠之飢噫嘻是物也奚足為堯
桀之是非巧言未竟於是紛紛紜紜齊齊醜醜或集四

肢或慙元首亦有應手而殺已亦遭撻雖幸中於一二
每駭逸其七八乃平怒而披衣聽鷄聲於天末含曙光
於北牕卧羲皇而却轡

蚋子賦

有序

五代

王周

蚋子之下有螟子螟子之下有浮塵子三者異乎皆狀
小而黑世云巴蛇鱗介中微蟲所變耳三伏間晝飛夜
息啞啄人肌膚動為瘡疥能飛不見其翼能嚙不見其
口微眇之極雖縝密衣服亦可通透莊生焦螟之說近

之也至微之蟲豸詩獨無蚋故作賦以廣之

蟲之至微名之曰蚋信乎蟻之別品為復蝨之餘裔羣
巢蝨之異類結搏牛之深契附諸鬱蒸產彼蕪穢張華
之識何以辨其兩翼離婁之明何以見其長喙伺暑締
之漏露萃豐肌而睥睨默然而至暗然而噬人之至靈
何闕爾之所衛人之至剛何反爾之所制狀斯咄咄籲
於造物何不恣蛇虺之毒必當與之為避何不張虎豹
之口不敢與之為忽豈其食人之膏血資已之肥腴念

膚體之何毀痛瘡痂之難沒吾將擷楸葉以為焚俾爾之銷骨者也

飛蛾賦

宋 鮑 昭

仙鼠伺闇飛蛾候明均靈外化詭欲齊生觀齊生而欲詭各會住以憑方凌焦煙之浮景赴熙燄之明光拔身幽草下畢命在此堂本輕死以邀得雖糜爛其何傷豈學山南之文豹避雲霧而巖藏

赴火蛾賦

宋 文彞諦

金少卿卷一百四十
悉達有言曰愚人貪生如蛾投火誠哉斯言信而有徵
也翔無常宅集無定栖類聚羣分塵合電馳因溫風以
舒散乘遊氣以徘徊於是朱明御節時在盛陽天地鬱
蒸日月昏茫燭曜庭宇燈朗幽房紛紛羣飛翩翩來翔
赴飛燄而體焦投煎膏而身亡

燈蛾賦

以人皆曰
予知為韻

唐
陳仲師

燈者火也尊而不親奚斯蟲之眇質翻體密而意馴必
將蹈火而後止是以疑冰之與鄰雖異探湯執熱之情

可見不蒙明照暗投之罪則均是以鴈飛無忘於避繳
龍螭有貴乎存神於以知無知之智有以同自知之人
無損於明雖光暉可借自貽其咎與壓溺同塵始其燄
燄中開青煙爰發薨薨四足白羽若月焦爛唐突離披
觸歷人心卒然天意若曰嬰焚灼者何如玉石之俱盡
處高明者曷若烏兔之屢闕且繼彼覆車雖百夫死難
而無餘納諸密網狀衆鳥驚飛而在初循環責實宛轉
投虛沉脂膏則屈死觸煙燄則焚如自我構患非天禍

予愛水螢之光載浮熠熠笑鼎魚之樂其斃徐徐阡乎
焦原可叶其義投畀炎火莫之知避曷若晨雞候明以
自得火鼠就燥而無累莫不守之以為順居之以為智
是蛾也餘光可託留影如寄排朱鏃扇輕吹胡塵爛於
瞬息為腐餘之容易若然者蠢蠢之類將外強而必乖
炎炎之著非內熱之所懷既油然相煦於膏火亦瞥然
相忘於形骸吾所以知捐軀於鼎鑊與是道而孔階

燈蛾賦

唐
范鳴鶴

流月半庭兮顏光初夕金釭坐明兮凝輝的的蛾繚繞
而未息意沉潛而自溺逝者已往存者可哀伊戚戚之
未畢俄栩栩而復來覩前軌之已覆因委命而不回彼
尚無恨哉殊化難窮神理斯昧物情無傷亦或貽害每
捐慮於進止恒忘懷於否泰任逍遙以無營將何負而
顛沛如膏之明豈怪前死比薰之馥豈惜同燬儔二美
而多慙痛一生之虛委明不可投投之必斃膏不可赴
赴之必泥彼優游之萬端奚於斯乎失計始來也吾故

知其必凶及死也吾未識於所從何生微而智劣苟不
若於自空爾愛候明何不候日光陰不留尚存爾質爾
愛候明何不候月素華將移爾猶不滅何相繼以焚軀
竟不知謀之為拙玄豹深隱終不效幾是蟲以慾卒與
命違豈若不死之仙鼠得昏夕而後飛

草蟲投燈賦

明區大相

芸牕夜讀膏火熒煌有蟲羣飛來就其光驅之復集抑
之彌揚東跳西趨厥命用喪惕焉以懼憚焉以傷援筆

作賦以善自藏有物微眇何名何類細若焦螟大過螽
蚋容成莫察其形夷堅莫辨其態或跳或躍或翔而逝
嗟眇質之易虐何謀慮之弗臧雖賊害之多門尤蹉踉
以自戕爾乃若華既謝朱火載揚咸出潛而離隱胥舍
暗而就明始投間而抵隙終入室而升堂竟環繞而不
去寧依違於末光方得意於搶攘本無心於翱翔忽決
起而乍伏乃觸禍而罹殃遂畢命於脂膏似捐身於鼎
烹原夫生徒有萬死徒亦然抑乘夜而變化將假物以

逝遷孰知夫趨炎之易於燼滅而處暗之足以自全彼
薨薨於方曉而趨趨於草根亦逍遙而自得安用附衆
而親人是以君子韜光守墨用晦為明鑒彼微物懼懼
天刑遜於不虞以保休貞

叩頭蟲賦

有序

晉
傅咸

叩頭蟲蟲之微細者然教之輒叩頭人以其叩頭傷不
祥故莫之害也

蓋齒以剛克而盡舌存以其能柔強梁者不得其死執

雌者物莫之讐无咎生於惕厲悔吝來亦有由仲尼唯
諾於陽虎所以解紛而免尤韓信非為懦兒出胯下而
不羞何茲蟲之多畏人纔觸而叩頭犯而不校誰與為
仇人不我害我亦無憂彼螳螂之舉斧豈患禍之能禦
此謙卑以自牧乃無害之可賈將斯文之焉貴貴不遠
而取譬雖不能觸類是長且書紳以自示指一日而三
省恒跼蹐以祇畏然後可以蒙自天祐之吉无不利

叩頭蟲賦

有序

明
張之象

叩頭蟲賦者晉傅咸之所作也以其謙卑自牧無往不利余乃謂士之進退必由禮義而得之不得固有命也彼之抑首脅息情態可嗤殆類夫奔諂燄熱者枉已辱身頗傷志操雖時或有遇非君子砥節之訓矣故反其意述此賦以諷當今之士并以自鑒焉賦曰

伊介性之不回本生理之至直曾子勵士以執毅孔公亟美於剛德高則抗首卑乃席膝體貌多端從義所即或送使於他邦或承主之賜食或感恩而必拜或引咎

而自責或升堂以覲母或見畫以興惻或修敬於德公
之門或陳經於誕聖之日仲尼却之而克當祖征受之
而兩得說大人勿視其巍巍為弟子不懈於翼翼近禮
之恭免辱遠恥無禮之慎其敝也蒞彼奮身而絕脰信
忠臣之不二雖喪元而甘心又何慙於勇士惟在邦而
如矢則史鮪之可希若枉尺而直尋亦軻氏之所非以
此齊餓者揚目而不食鍾離意得珠而固辭周侯持法
於細柳蘇武建節於外夷若乃王丹之餞陳司馬特不

拜以為贈汲黯之遇衛將軍但長揖以致敬見甄后而不伏固劉楨之守正向小兒而折腰斯陶令之解印馬援藐帝壻而不答顏含謁丞相而無佞庾袞重施禮於人親盧鴻以罄折為忠信王祥欲以德而愛人何點雖箕踞而奚病至於孟嘉之不知落帽卞彬之不恤投幘孫楚參軍而稱命鄭眾奉使而威敵井丹被褐以凌坐嚴遵矯手以應辟上交不謫威儀是力總諸賢而共然蓋有作而在昔何茲蟲之細瑣乃逢人而委靡鮮英豪

之骨鯁多婦寺之詭隨將無患而致感或望塵而下之
詎覩抗司徒之趙壹焉聞動高祖之酈其擎跪曲拳繁
辟佞假阿區逡巡偃僂骯骯每低眉以趨承時稽首而
祇畏似此物之佞媚抑維何而比類仰慙蝨馬之高潔
俯謝螳螂之勇銳足不能前目不敢視委蛇蒲伏覆面
掩地莫謂周襄之胙謬同魯繆之餽乖媯皓之哀誠甚
鄧通之恐悸何闕高鳳之解爭乃欲謝鯤之拜勢豈夏
禹之樂其昌言實蘇嫂之懾於高位等搖尾而不殊與

崩角兮何異匪飲酒而多儀猶乞璠之可媿吁嗟而頭
辛苦無益千醜萬辱同彼施戚羨舐痔之得車忘吮癰
之遇厄徒自病於頤頤又誰愍其爛額如浣蘇則之膝
必忿恨而弗懌借有朱雲之劒雖斬所以何惜况窮通
之有定信運命之難更干人者未必果獲屈膝者安可
復伸是以非義之錢而趙勤弗屑閹人之勢則高允所
輕不有簡介之熙載將無嚴整之曜卿仲孫敢言而甚
切子高抗手而遂行王無功久厭於繁禮向玄季自處

以素情田子方驕人以貧賤宋使者正對於會盟韋仁
約獨立以司憲江休映無屈於延明願與壁而俱碎慕
蘭如之敢於抗秦觸屏風而就睡感陳咸之篤於諷親
若夫獸取獬廌咋邪是任草稱屈軼指佞於庭覩正氣
之猶在徵直道之可循懦夫聞風而立志壯士怒髮而
挺身與其曲鉤之取貴孰若如弦之守貞寧同此彊項
之賢令毋似彼黃頭之小人厥咎頗深於子羽是宜反
責以斯文知微言之廣喻請三復而書紳

蝎賦

唐
李商隱

夜風索索緣隙憑壁弗聲弗鳴潛此毒螫厥虎不翅厥
牛不齒爾兮何功既角而尾

金龜賦

有序

宋
薛士隆

金龜爪蠹也似龜而小首足介尾咸具色若中金焉惟
其冒乎外者輕明若雲母有翅附甲而生巨領雙髯腹
下多足與龜為異弗察乎邇無見也名無能得於古世
以形象目之慨其似是而非可為兒童戲翫實無所可

用其於靈壽何有多翼而飛不及遠難矣乎哉因感而賦

春氣霽其融和兮東風習習以生庶卉資以茁萌兮屯
然而成厥形寂書堂其蕭寥兮聊縱步以抒情行瓜田
而徜徉兮瞥玉靈之異常蹇至微而賤軀兮遵柔柯而
微行體渾金之萃美兮色曜日而舒光巨首顒顒兮神
屋歸然以隆足孔舒兮甲墮如以豐負上兮天穹爪旁
出兮四方背負盤兮峻丘山之昂藏昭以晰兮列宿嚙

其同明吁嗟庶物百其形兮同類殊情不可命兮龜生
千年巢夫蓮兮萬歲木居緣而升兮五色備具為可稱
兮曠古不聞遊蔓藤兮託質精鍊為見情兮款神物兮
出倫類去泥塗兮將自異豈長年兮於此焉極非仙靈
兮茲焉嬉戲情悅滌兮無主立躊躇兮不語龜蹢躅兮
如顧倏翻然兮飛去驚予心兮駭目歎瑰奇夫龜者神
悠揚兮未安俄翩跹兮來下睨而視之若是而非觸而
止之屈信則微予始怪兮載疑反復之而究兮知多之

象之喙有髭兮磔豎下紛如今多足雲母薄如翥之覆
也靈龜隱如文之著也尾足成形彩之傳也不可窺也
矧可度也伊飛蠱之微麼亶資氣而含靈感爪滋而賦
性腐草出而同螢等蟪蛄之脆弱知何秋之嘗更瑣厥
躬之譎薄兮稟非常之妙形神有愧於知來兮壽奚極
夫千齡惜形似而蔑有兮亦猥當其美名觀夫德其茫
若兮甲疑乎可貞曖八卦之無象兮千里曷其如繩氣
靡服乎比瓜葉之靈者潛豈伏兮蠹以濟其調飢蠹而

蠅兮何識何知內匪明兮莫決乎疑曾可責兮知彰知
微泯同形而非類兮性天邈如羌僭竊其虛名兮誰與
卜無庸兮藏廟堂宜終年兮於野何親人而詭以求全
兮德亦安取嗟彼服之不稱兮適以焚身將兒曹之翫
愛兮斃焉無所亂曰偽亂真兮道之賊若胡為兮象之
惑內不靈兮死其文受茲服兮其何獲感微蟲兮作賦
庶永鑒兮夙夜凡百君子念茲無射

蠅虎賦

元
戴表元

有蟲翼然既獰孔武若腹而絲若臂而拒跳踉振擲是
謂蠅虎搏蠅甚智狙伏壁間羣蠅避之如虎於山我玩
掌中以弄以嬉惴不敢動蠕蠕蠕蠕先生欣然笑而置
之我聞古人龍猶可豢惟虎必誅與民除患或生得之
用之於戰蓋與死而為鄰嘻其危而敢玩乃有至人以
道豢虎居以為徒出以為御又有人焉虎至不怖曰我
不爾惡爾無我怒與虎相忘其道甚恕嗟爾蠅虎何為
者邪謂非虎邪於蠅不仁謂誠虎邪遇我而馴或曰搏

人所憎不為不仁故見畏於蠅其所以見狎於人或曰是亦虎類馴之有道蠅視之大我視之小藐然掌中以馴易暴亦如彼虎雄跳躁擾極衆庶之所驚纔至人之一笑嗚呼噫嘻物之於人嗜欲血氣鮮有不同意兩銳者必奪力俱強而乃攻此其無齒牙而忍不瓜距而凶搏善良以為食腴膏血以自豐其名為人其實有遠媿於爾蟲者矣誠得道以御之彼雖暴而莫動故有談笑而儀行挫謀拱揖而孟賁失勇索而言之理無不然一

日之內一身之間陰陽水火寇奪百端有道於此愈攻
愈堅泰山裂車而目不瞬疾雷破柱而足不遷四海一
航八荒一席干戈血肉之區歌舞腥臊之域閱千載於
須臾忽微蟲之過隙謂振古之如斯復誰喪而誰得於
是先生頽然如醉嗒然欲默縱吾意之所如聊優游而
偃息

蟲賦

唐
李商隱

亦氣而孕亦卵而成晨鷺鳴露鶴不如其生汝職惟蓄而

金匱要略卷之四
卷一百四十
不善齧回臭而多跖香而絕

後蟲賦

有序

陸龜蒙

余讀玉谿生蟲賦有就顏避跖之歎似未知蟲作後蟲
賦以矯之

衣緇守白髮華守黑不為物遷是有恒德小人趨時必
變顏色棄瘠涵腴乃蟲之賊

又後蟲賦

有序

明顧大韶

李商隱有蟲賦陸龜蒙有後蟲賦李止譏其齧臭未盡

其罪也陸更賞其恒德則幾好人所惡矣作又後蝨賦以正之

仁不害人義不穿窬傷人及盜漢法必誅二罪并發乃在濡需請數其惡始服厥辜昆蟲之醜實繁有徒與人相邇損益各殊蠶絲蜂蜜反効勤劬絡緯促織蜻蛉蟋蟀螢飛蝶舞助人為娛若斯之倫固不可無鼠婦蚰蜒穢我階除胃庭網戶蠨蛸蜘蛛螻蛄鳴於土蚓歌於塗怒臂螳螂祝子蒲盧撲火役鬼投燈煎軀煖產竈馬羶聚

玄駒地鼈蝸牛負螯推車總屬堪憎無傷於吾若斯之
倫聽其所如爰有白蟬善齧吾書蠹侵嘉樹蛙耗米珠
蝗螟螻蛄嘉種是鉏醯敗於蚋肉敗於蛆飛蟹食柱青
蠅浣裾是皆吾讐害未剥膚情在可宥我咸赦諸蠹尾
惟蠍鉤牙惟蛛蠼蝮似蜮玄蜂若壺蛭縮如樗虺行蠕
蠕守宮壁鏡藏毒不虛凡彼蠱螫可避可祛有犯則殺
固難盡屠蛔螬匿胃蚘蟻潛膚我欲除之無形可割蝨
恃矯翼蚤憑輕軀我欲捕之轉盼而逋若汝蟲者何能

為乎形眇一黍質無半銖或入吾禪或託吾襦旬日累
代繁孳而居黑食頭垢白吮身腴爾類日肥我貌日癯
瞥焉見察循絜鑽初既貪且懦既鈍復愚肉食之鄙曾
莫汝踰湯沐既具汝命難紓罪不在赦慎勿怨余蟲聞
斯言匍匐俯伏靜聽謹訶祈緩沸沃傾耳聽之杳無聲
觸齋心以聆若訴若哭號物萬數惟天並育蠢動含靈
誰非眷屬身命布施千聖軌躅嗟君之量何其褊促我
食無穀我啜無菽天賜我餐惟血也獨我首無角我喙

無啄微啞君肌何遽為酷君何不廣請觀朝局聞諸商
君吾友有六皆賜天爵皆賦天祿榮妻任子亢宗潤族
吸民之髓蒙主之目僨事無刑廢職無辱嬉遊畢齡考
終就木我羨我友飛而擇肉我罪伊何太倉一粟君欲
我誅盍速彼獄我聞蟲言怒髮上矗叢爾微蟲寧望禽
畜積汝億命不比奴僕敢擬朝士騰茲謗讟即汝明刑
豈止湯沐繫之以髮懸之以竹細篠為弓繡鍼為鏃弦
絲射之一發洞腹尸諸棘端以為大戮

罵蟲賦 有序

元 楊維禎

楊子自鐵崖山中客錢塘初宿市舍脅未暖席有物噉
身若芒刺然已而噉肉皆起癰瘰十指爬搔不得停搔
訖即成瘡痂亟命童秉燭枕褥間了無一物復睡則噉
如故遂挈胡牀露坐待旦明日問舍長舍長曰此壁蟲
也當茲旱氣熯然城中舍皆是物問何狀命童剔牀第
空出之蟲非蟲蚤非蚤以爪掐之其臭令人嘔惡楊子
歎曰異哉有是物也昔玉溪生荆舒老人先後為嫉蟲

之作而未有指斥是物者豈其潛於昔而出於今抑其
幸見漏於指斥也余既楚其毒迺作文罵之曰

惟爾蟲之種類不一也在狗類蠅在牛豕類蟻在人處
緇而白處白而緇者其么若蟻不知又有爾類蟠腹而
輕身纖足而勁臂或青或紺或黃或紫白晝潛藏昏黑
跫起脫走如珠狙刺如矢使人脅不得以帖席肱不得
以曲几追蹤捕痕若亡若存遁影朽空滅跡密紋湯沐
所不能攻掌指所不能捫但見肉斑鱗其成瘰癧室粟

其生龜怒牀几而欲剖避衾褥而欲焚嗚呼爾蟲兮蜂
則有蠆兮蜂可祛蝎則有螫兮蝎可誅嗟爾么類孰能
屠騰蛇神兮殆即且即且狡兮制蠱蛛嗟爾么類又誰
咭咨大化之好生恐一物之弗紓胡爾惡之兼毓為吾
人之毒荼飽膏血之毒甯資肥腠之臭軀吾將上告司
造殄爾類非無辜也辭畢是夜夢有被玄衮裹絳服而
至者若有辭曰吾即見罵爾文者辭義既嚴敢不退避
然吾小毒小臭爾亦知世有大毒大臭者乎姦法竊防

妨化圮政剥人及膚殘人至命闕若豺虎盤甚梟獍此
非大毒大臭者乎為國之病而司臬不屏其或分民曲
直任國是非義無避位仁不讓師則丹書是絳皐櫝見
遺彼大毒臭又何憚不為乎且吾起伏適節消息乘機
白露洒空勁風吹衣蟬蛻而退莫知予之所歸子試絜
夫大毒者毒無已時大臭者臭無窮期孰為可詈不詈
乎子不窮南山之竹以為辭而詈予瑣瑣不已戲乎於
是楊子增憤加怖涕泗不支霍然而覺不知蟲之所之

蟄蟲始振賦

以和氣初發幽蟄潛啟為韻

唐王起

蟄以寒閉春以陽和閉者待時而後振和者煦物而無
頗萬穴之中或羽毛而櫛比積塊之下或鱗甲而駢羅
咸蠢蠢以潛發應熙熙之屢過則知出處有時變通為
貴煦嫗斯感嚴凝罔畏跂行喙息負日月之融光蠕動
蠓飛得天地之仁氣爾其形分土石色動丘墟潛乎野
處達彼巖居歷窮陰而茲久當獻歲之厥初思麗景之
鳴躍念和氣以吹噓順於時比應雷之雉感於候同上

冰之魚况夫勾芒整轡太簇紀月蒸以綢緼歛其膏發
或振羽而不倦或動股而不歇細則胼蟹以凌空巨則
連蜷而映窟處否藏周逢時出幽順地之理承天之休
將昭蘇而忽變豈枯槁而為儔相像山川依稀原隰氣
且布於感動形無違於燥濕祕邃泥蟠依稀土蟄青雲
之表期蜿蜿以龍升繡戶之前佇翩翩而燕入則知離
於淹滯託彼沉潛苟存身而有待必坯戶而是瞻豈惟
月令舊章紀之而無數時訓前典徵之而不厭客有窮

屈伸之理得行藏之體固無恨於陸沉將必俟於天啟



御定歷代賦彙卷一百四十